

■ POSTA SVIZRA

Social Distancing
era tar la Posta

(fme) Gist en quest temp da crisa sa stenta la Posta d'ademplier vinavant cun grand engaschament da sias collavuraturas e colavuratur cun procurar che pachets, brevs e gasettadas anflan la via tar lur adressats. Di per di sto la Posta dar dumogn ad in enorm quantum da pachets sco quai è normalmain il cas mo il temp da Nadal. La Posta haja bain vinavant la finamira da porscher ses servetschs a nida illimitada. Damai che cunzunt la spediziun da rauba da gronda dimensiun sco mobiglias, velos e chasas da curtin saja creschida surproporzionalmain stoppia la Posta dentant limitar parzialmain talas spediziuns. Per distgargiar e proteger sias collavuraturas e ses collavuratur supplitgescha la Posta dentant era la populaziun da risguardar las directivas da l'Uffizi federal da sanadad tant als spurteglis sco als ischs da las chasas privatas ed a las portas da las interpreas. Per part sto la repartiziun er succeder en etappas.

■ BANCAS

Credits d'urgenza
èn dumandads

(rtr/fmr) Dapi la gievgia survegnan fatschentas ch'han problems finanziaals pervia dal coronavirus credits d'urgenza da las bancas. Bancas grondas sco er pitschnas en il Grischun han gia concedi numerus credits. La Banca Chantunala Grischuna haja survegni 250 dumondas per credits durant l'emprim di. Quai da Thomas Roth da la direcciun. Fatschentas ord differentas branschas sco il turissem, la gastronomia u er l'industria hajan fatg talas dumondas. Tut ils credits che la banca haja dà ora, sajan stà credits da l'emprim stgalim, pia fin 500'000 francs. Roth quinta ch'il dumber per dumondas da credits vegn er a restar il proxim temp aut tar la Banca Chantunala.

Er bancas pli pitschnas han gia durant l'emprim di survegni dumondas per credits. La Banca Raiffeisen Engiadina/Val Müstair radund 50, di il manader Thomas Malgiaritta. Els hajan dà credits per bun 4,1 milliuns francs, credits che gajan da 20'000 fin 350'000 francs.

■ DOMAT

30 onns
Dis da litteratura

(cp/fmr) Ils Dis da litteratura a Domat pon festivar quest onn il giubileum da 30 onns. Dapi blers onns gioja tar quel festival litterar rumantsch la concorrenza Premi Term Bel in'impurtanta rolla, sco ch'il comité d'organisaziun scriva en ina comunicaziun. Il modus da quell'occurrenza ha però adina puspè midà. En occasiun dal giubileum da 30 onns vul il comité d'organisaziun però turnar tar l'andament usità cun ina pregiuria che selezziunescha, cun ils tschintg finalists che prelegian sez lur texts e cun ina giuria «sur place» che discutescha publicaimen ils texts.

Ils Dis da litteratura han lieu quest onn a Domat dals 6 fin als 8 da november 2020. Il Premi Term Bel vegn sponsorà da la Vischnanca burgaisa da Domat ed è dotà cun 3000 francs per il text victur da la giuria e cun 1500 francs per il text favorit dal public.

Detagls cun terminis e cundiziuns da la concorrenza èn da chattar sin www.discalitteratura.ch.

Provediment sanitar è anc adina garantì

La regenza grischuna sustegna las decisiuns dal Cussegl federal

DA MARTIN CABALZAR/FMR

■ Il Cussegl federal han concludì da permetter als Chantuns da restrencher u schizunt sistir per in curt temp l'activitad da tschertras branschas economicas, sche la situaziun epidemologica pretenda quai. Quai duai dentant esser pussaivel mo sut premissas severas. Actualmain vala quai mo per il chantun Tessin, nua che la crisa da corona è particolarmain gronda, ha punctuà la fin d'emna il minister da sanadad Alain Berset.

Tant per il Cussegl federal sco per la regenza grischuna è il provediment da sanadad anc adina garantì en l'entir Chantun ed era en las valladas dal sid. La regenza vegnia dentant ad observar attentamain la situaziun cunzunt en las regiuns Moesa e Bernina e giuditgar permanentamain, schebain mesiras supplementaras fissan necessarias. I saja dentant era impurtant da savair che l'indemnisaziun per lavur curta scroda, sch'ils Chantuns ignoreschian las premissas decididas da la Confederaziun.



Decisiun dal Cussegl federal

Considerond la situaziun extraordinaria ha il Cussegl federal decretà las medemas reglas per l'entira Svizra. En il center da tut las stentas stettina la protecciun da la sanadad da la populaziun ed il mantegniment dal provediment da la sanadad en tut las regiuns da la Svizra. Tenor l'ordi-

naziun adattada dal Cussegl federal duain excepziuns da questa regla esser pussaivlas mo a moda fitg restrictiva, e quai mo per curt temps. Mo uschia saja garantì che las chadainas da produziun impurtantas na vegnian betg interruttas a moda nuncoordinada, ha fatg valair il Cussegl federal venderdi passà.

Per ch'il Cussegl federal possia conceder ina lubientscha speziala, dovria differentas premissas che stoppian esser adempidas a moda cumulativa:

- Sch'il chantun pertutgà ha er suenter il sustegn d'auters chantuns betg avunda capacitads en il provediment da sanadad.

- Sche las branschas pertutgadas n'èn betg ablas da realisar las mesiras da prevenziun pretendidas.

- Sch'ils partenaris socials acceptan las mesiras suenter ch'els èn vegnids consultads.

- Sch'il provediment da basa da la populaziun cun rauba dal basegn quotidian ed il provediment da las instituziuns da sanadad sco era da lur furniturs restan garantids.

- Sche la funziunalitad da las branschas economicas pertutgadas è restrenschida, perquai ch'ils cunfinaris mancan.

La regenza grischuna sustegn il Cussegl federal

Tenor la regenza grischuna n'ademplescha actualmain ni l'entir chantun ni singulars regiuns questas premissas. Il provediment da sanadad saja garantì en l'entir chantun. La regenza saja dentant pronta d'observar permanentamain la situaziun cunzunt en las regiuns talianas en il sid



Il nov tract da la staziun d'intensiva da l'Ospital chantunala a Cuir porscha 42 plazzas equipadas cun apparats da respiraziun. Quella po uss vegnir averta gia l'avrigl e betg pir il matg.

FOTO SOMEDIA

dal Chantun. Il stab directiv chantunala preschienta mintga di in rapport da la situaziun per tut las regiuns. En la regiun da Moesa hajan ins constatà che numerus plazals èn serrads. Tenor la regenza vegn il Chantun a rinforzar sia preschientscha ed activitad da controlla, e quai en tut las regiuns.

Tegnair distanza e star a chasa

La regenza grischuna appellescha anc inagiada instantamain da resguardar tut las reglas da cumportament, en spezial da tegnair distanza e da restar a chasa. Grup-

pas da passa tschintg persunas èn scumandadas. La regenza supplitgescha er possessurs d'abitaziuns secundaras da restrencher lur mobilitad e d'evitar d'engreiar senza basegn las infrastrukturas da sanadad en il chantun e cunzunt en las vals dal sid.

Tenor l'avis da la regenza vegn la crisa actuala anc a cuzzar emnas. La regenza engrazia perquai a la populaziun ed als giasts per la chapientscha e per la solidaritad. «Mo cuminaivlamain sa lascha dumagnar questa crisa», concluda la regenza ses appel a la populaziun.

Da chavels illa schoppa e sains cun hangover

La publicaziun «Na, ogets nu discuorran!» da Göri Klainguti

DA SIDONIA PAZELLER/FMR

■ Illa plü nouv'ouvra da Göri Klainguti lascha l'autur gnir a pled ad ogets da minchadi, ma brichafat banals. Uschè s'incuntra tanter oter ad üna passiva illa naiv frais-cha, ün code impertinent, e neir ün rispli nu das-cha mancar. Tuots chi vegnan a pled. «Est tü ün dret scrivaint?» – «Dret na, ma ün scrivaint rumantsch», respuonda il scriptur al chavè illa schoppa. Intant cha la blera glicud vess allontanà cun s-chif il chavè e pretais üna nouva schoppa, s'ha quist giast tut il temp per ün discuors cun tal chavè. Svelt as müdan las tematicas da l'affera da la portadra dal chavè a raquints biblics e van a finir illa forensica ed in proverbis paulus.

Amo daplü chavels illa schoppa

Chavels paran insomma d'esser omnipreschaints i'l cudesch da Göri Klainguti. Uschè eir illa parabra dal diavel culs trais chavels d'or, chi vain quintada our d'üna nouva perspectiva, o meglder dit, agiunta cun ulteriuras infurmaziuns. Per exaimpel vegn tradi, cha l'eroe s'impipa insè da la princessa chi til es impromissa, e ch'als trais chavels dal diavel vegnan dovrats per analisas da DNA in labors da la China ed in America. Ed eir scha la parabra es situada i'l 19avel tschientiner, es fingià involvè il departament per scienza ed educaziun ill'expediziun giò l'infier. Sper tuot la chavliura, cumparan uschè eir adüna pizchadas vers bürocrazia e turissem, minchatant ün zich zoppà tanter las lingias, ma suvent eir tuot direct. Sco cha la passiva illa naiv frais-cha constata, as referind ad ün disegn da Jürg Parli: «Il turistiker nu vain staungel da blagher cun nos chapitel: la natüra intacta!»


Critica invers Klainguti

Ils ogets e las figuradas da Klainguti nu critichechan ed as referischan però be a politikers mundials e regiunals, tematicas da feminissem ed egualità. Perfin Klainguti s'essa vain criticà da tuottas varts in si'aign'ouvra, tant chi algorda als discuors tanter ün ventriloc e sia figurada. Eir scha sco lectur e lectura as saja vairamaing cha l'autur construischa ils dialogs e mett'in bocca ils pleds als ogets, va quai adüna darcheu in invlidanza durant la lectüra. Per mai personalmaing es quai üna da las caracteristicas las plü interessantas dal cudesch. Sper la gronda creatività chi's cugnuscha inschnà bod be amo d'uffants, es il scharm dals discuors quai chi tils fa gnir fascinants. Tras quai cha messagis chi valessan otramain sco spinus, delicats o perfin tabuisats vegnan transmiss da dats, guotas e zops cun caracter simpatic, s'essa sco lectur(a) plü avert(a) per tils retschaiver.

E sco bonus implü, as vegna a savair amo üna schurma fats e constataziuns chi tendeschan da la scienza fin a la filosofia. Insomma esa difficil da definir ils cunfins dal cuntgnü dal cudesch. Las tematicas sun uschè variadas sco las fuormas da discuors. L'unic constant es l'inconstanza. Klainguti definescha reglas per güsta tillas rumper darcheu: «(...) a'm ruiner mia stricta intenziun da nu'm repeter, per üna vouta, per üna vouta da nu'm repeter in quists texts novs.»

«Na, ogets nu discuorran!» es üna collecziun d'istorgias cuortas, umoristicas e divertentas, chi dan però eir üna o tschella jada andit da far aignas ponderaziuns sur dal muond e la società. Ellas vegnan accumpagnadas da bundant üna dunzaina comics umoristics d'ogets chi discuorran, disegnats dal autur. Dimena üna lectüra adattada pel passatemp, güsta uossa chi'd es da star ün pa daplü a chasa.

Il cudesch «Na, ogets nu discuorran!» po gnir retrat in tuot las librerias cun cudeschs rumantschs. Actualmaing piglian diversas librerias incunter postaziuns telefonicas o per e-mail e tramettan il cudesch in chasa.



Il «sain cun hangover» es üna da vers üna vainchina illustraziuns da Göri Klainguti, publicadas insambel cun seis texts in «Na, ogets nu discuorran!»

Leger cunter la crisa

En ina pitschna seria preschenta la FMR quest'emna tschintg cudeschs pli actuals rumantschs, cumparids ils davos temp. Tut las publicaziuns pon vegnir retratgas en las librerias cun cudeschs rumantschs. Actualmain prendan diversas librerias encunter empustaziuns telefonicas u per e-mail e tramettan ils cudeschs a chasa. Cudeschs da la Chasa Editura Rumantscha pon era vegnir retratgs direct sur www.chasaeditura.ch.

Göri Klainguti

Na, ogets
nu discuorran!

Il cudesch «Na, ogets nu discuorran» da Göri Klainguti - es cumparü l'onn passà pro la Chasa Editura Rumantscha.